



Yiu di Pueblo, escohi door di Pueblo, pa traha pa e Pueblo

BETICO E PROME MINISTRO PRESIDENTE DI ARUBA

Awe mas cu nunca nos di Comision Pro-Betico Croes ta desea di drenta boso hogar pa asina conhuntamente nos por analisa e importancia di e eleccion venidero.

Aruba pa añanan tabata lucha pa reconocimiento di un causa y porfin dia prome di Januari 1986, Aruba lo ta liber politicamente y por dicidi ariba su propio destino o futuro.

Den e ultimo 15 añanan e lucha a bira mas ferviente y e joven dinamico y ilustre politico, yiu di tera aki, Sr. Betico Croes, tabata sa di a keda para firme dilanti politiconan di e otro islanan di Antiyas Hulandes y di Hulanda. Jamas e pueblo aki a conoce un politico di tal magnitud cu ningun momento so a rindi o a perde esperanza cu un dia nos lucha lo ser reconoci.

Betico tabata sa di a uni su pueblo, uni tur gremio y ta algo cu ta pa prome biaha den historia politico di Aruba cu un lider a logra esaki, pa asina muestra na mundo henter cu e pueblo ta dicidido pa su lucha y futuro.

E tabata sa di a cruza fonteranan di otro continentenan pa a pidi respaldo di otro paisnan pa cu nos lucha y a logra esaki tambe. Betico a bira mundialmente conoci y nos tur como Arubiano mester ta orguyoso di mira con un yiu di e tera aki tabata sa di a representa nos internacionalmente den un forma inteligente y capaz.

Awe Pueblo di Aruba, e berdad mester ser bisa, cu ta gracias na e union di e Pueblo di Aruba, enca-besa pa un gran politico, Sr. Betico Croes, cu Aruba dia 1 di Januari 1986 lo por canta gloria, canta su himno y hisa su bandera y lo pasa pa ta den fila di paisnan liber.

Den nos region nos conoce diferente isla y pais cu a haya nan

libertad, pero ningun di nan a bira asina popular y a haya asina tanto reconocimiento manera esun di Aruba, pakico?

PASOBRA BETICO TIN SU CONTACTONAN INTERNACIONAL Y TA SER RECONOCI AKI DEN LATINO AMERICA COMO UN GRAN POLITICO. Betico internacionalmente ta Aruba y tur otro paisnan tin aprecio y admiracion pe y nos como Arubiano mester ta orguyoso di dije.

Si Betico tabata sa di e lucha ferviente pa a realisa e causa di nos pueblo, anto nos di Comision Pro-Betico ta kere cu como Ministro Presidente di Aruba, e lo ta e homber, e politico cu lo salba e economia di Aruba.

Betico a muestra su capacidad ariba e tereno estatal y nos tin pleno confianza, tumando na consideracion su inteligencia, pero mas aun su contactonan internacional, cu e lo mejora e situacion socio-economico di Aruba.

Den varios ocasion Betico a anuncia cu na momento cu e juramenta como Ministro Presidente di Aruba, cu e lo introduci e Ley pa explora y explota e petroleo y e gas natural di Aruba.

Esaki ta otro muestra di e intencion serio di Sr. Betico Croes pa traha na interes general y e situacion socio-economico di Aruba.

Jamas Pueblo di Aruba por lubida e dia 24 di April 1983, na momento cu e a keda mortalmente herida pa un bala di un revolver policial. Esaki tabata e dia mas scur y tristo aki na Aruba y henter Pueblo di Aruba sea cu nan tabata simpatisa cune si of no a reza y a pidi Señor pa su bida. **KICO TABATA E CONSECUENCIA SI E HEROE BETICO A FAYESE? ARUBA LO A LOGRA DI HAYA E STATUS APARTE? ARUBA LO A KEDA MANTENI UNI? ARUBA LO A PERDE TUR SU CONTACTONAN**

INTERNACIONAL? A keda demostra cu door di oracion y pidimento na Señor awe Betico, apesar di no ta goza 100 por ciento di su salud, ta meymey di nos.

Pesey Pueblo di Aruba, awor na bida laga nos ban mustre cuanto nos ta stime, cuanto nos ta aprecie, y cu nos lo dune e maximo honor, pa tur e sacrificionan cu e a haci pa nos, pa e ta e Prome Ministro Presidente di Aruba.

Pueblo di Aruba analisa pa boso mes, cu nos mester ta agradecido na Señor cu nos tin un lider politico inteligente y bon prepara cu a demostra di ta grandi y cu ta un di esnan mas reconoci den henter Latino America.

PUEBLO DI ARUBA: TIN UN OTRO LIDER POLITICO ACTUAL CU E MESUN CAPACIDAD CU BETICO? TIN OTRO LIDER POLITICO CU POR A HIBA UN LUCHA ASINA FERVIENTE CU DIA PROME DI JANUARI ARUBA LO HAYA SU SATUS APARTE? TIN OTRO LIDER POLITICO CU TIN ASINA TANTO CONEXION INTERNACIONAL MANERA SR. BETICO CROES? TIN OTRO LIDER POLITICO CU DOOR SU CONEXIONNAN INTERNACIONAL CU POR LOGRA TRAHA Ariba e economia di Aruba y garantiza nos un bon futuro?

Pueblo di Aruba nos ta sigur cu boso contesta ta negativo y ta di acuerdo cu ta Betico ta e lider, e politico di mas grandi den historia politico di Aruba.

Betico Croes, como e ilustre yiu di tera, e luchador di e causa di Aruba cu confiansa di nos pueblo mercedamente lo ta e prome Ministro Presidente di Aruba.

Atentamente,

COMISION PRO-BETICO

GILBERTO FRANCOIS CROES

Betico, na Aruba/Antiyas/Hulanda y den otro paisnan ta un persona sumamente conoci. Aki na Aruba su forma di atende su Pueblo, su sensiyes ta resalta ariba tur otro lider politico. E ta un persona cu ta goza di mayor popularidad y ta ser considera como e politico den historia di Aruba.

Betico ta un persona social y stima den comunidad.

Betico a nace dia 25 di Januari 1938, e ta yiu di Mimita y Panchico, kendenan ta biba na Santa Cruz. Betico tabata casa y ta tata di 4 yiu, kendenan ta Guisette, Glenbert, Junior y Glendeline. Guisette su yiu mayor ta studiando na Hulanda, mientras cu Glenbert y Junior ta studiando na Merca y Glendeline ta siguiendo su estudio aki na Aruba mes.

Segun su mayornan, Betico tabata

un mucha masha obediente y semper tabata cla pa yuda na cas. Di chiquito e tabata un bon estudiante y tabata tin diferente amigo cu tabata bin hunga cerca dje na cas.

E a lanta cu hopi respet pa su mayornan cu sigur a yude den formacion di su caracter y personalidad.

Despues di a termina su estudio basico, el a bay 3 aña di H.B.S.-B na St. Dominicus College, pa despues bay Hulanda pa studia como maestro di school.

Na Hulanda Betico tabata hopi activo den diferente organizacion social y Antiyano cu tabata traha na bienestar di e Arubiano y Antiyanonan.

Betico semper a conta cu su bida na Hulanda no tabata uno facil, pero a conoce hopi sacrificio y hasta e mester a traha pa a termina

su estudio. Tambe semper e a keda na altura di tur e acontecimentonan politico cu tabata sosode na Aruba.

E tabata un gran amante di literatura y principalmente bida di politiconan mundialmente conoci tabata interese masha hopi. Tambe historia politico di cualquier pais, pero principalmente esun di Hulanda, Antiyas Hulandes y Aruba tabata tin su atencion. Tur esakinan a yude prepara su mes politicamente pa awe e por a carga un responsabilidad asina grandi.

Amigonan cu a studia hunto cune na Hulanda y cu kendenan nos a combersa, a manifesta na nos cu Betico tabata un estudiante sobresaliente y activo y cu desde e tempo ey tabata papia na favor di Aruba. E tabata mantene e grupo di Arubianonan uni y tabata bisto for di e tempo ey cu Betico ta un lider.




Betico tabata e Prome Parlamentario Arubano cu a dirigi palabra den "Tweede Kamer" na unda ela trece dilanti e deseo di pueblo di Aruba: STATUS APARTE.

BETICO BEK NA ARUBA

Regresando Aruba como maestro di school cu "Hoofdakte" e a bay duna les na St. Jozefschool na Santa Cruz. Betico no solamente tabata ser conoci como un bon maestro, pero tabata yuda masha hopi ariba e tereno social. E tabata dedica hopi tempo na esnan cu no por a studia bon y tambe na esnan menos afortunada.

E a bira un persona hopi conoci ariba tereno di hubentud, deporte, musica, cultura y social. E tabata yuda den diferente organisacion social na Santa Cruz y di Aruba. Su alumnonan tabata hopi orguyoso di dje y te dia di awe nan tin un grato recuerdo di dje.

Apesar di tabata un persona hopi ocupa e a logra obtene su L.O. Spaans y L.O. Handelskennis y a bay duna les na St. Antonius College y bay yuda directamente den formacion di e hubentud di Aruba. E tabata goza di hopi admiracion di tanto su coleganan como di su alumnonan pa e forma cu e ta dedica na enseñanza di e Pueblo. Den su Pueblo tur hende tabata conoce como Meneer Betico, pasobra e a siña su alumnonan e disciplina berdadero cu un Arubiano mester tin pa progreso di su vida.



Betico como Diputado na 1967 bishitando e diferente schoolnan den compania di Vice-Premier Hulandes Bakker y Gobernador di Aruba Sr. Oscar Henriquez.

BETICO COMO POLITICO

Na aña 1967 e a drenta politica activamente y aparece ariba lista di A.V.P. y a obtene nada menos cu 1045 voto, combirtiendone e asina den e hoben politico mas popular di e tempo ey. Gracias na su siste-

ma di hiba discurso y politica cu A.V.P. a acumula un cantidad considerable di voto te cu nan a forma gobierno.


Betico a ser elegi como Diputado y a ocupa e posicion aki for di Juli 1967 te cu 2 di September 1970.

Como Diputado Betico a trece un cambio considerable y a comberti su mes den e prome politico cu tabata tin un contacto directo cu su Pueblo y no tabata interesa den posicion, pero a keda e simpel homber di Pueblo.

Como Diputado e a dedica masha hopi tempo na enseñanza di Aruba y durante su periodo a keda construi schoolnan di Macuarima, Pos Chiquito, mientras cu Colegio Arubano, John F. Kennedy y diferente otro school a keda expandi.

Betico a pensa masha hopi ariba e hubentud y ariba e posibilidad pa mas deporte, tumando na consideracion cu deporte ta traha patria y cu esaki ta kita e hobennan di mal bicio. Como Diputado e a bin cu e proyecto pa traha e Sporthall na Santa Cruz, awe hubentud di Aruba tin un lugar adecuado pa haci deporte.

Tambe como Diputado e a



Betico un bon tata di famia junto cu su yiu Junior.

introduci e popular 'bibliobusnan' cu ta pasa di school pa school y di distrito pa distrito. Esaki e a cuminsa cune pa stimula e hobenan cu lectura ta importante pa un desaroyo mental sano di cualquier ciudadano.

Un hoben cu kier progresa mester por lesa hopi y Betico a ofrece nan e oportunidad aki treciendo e bukinan te den porta di nan schoolnan.

Asina, pues, nos por sigui mencion a diferente proyecto cu Betico, como Diputado, a realisa pa e comunidad, pa su Pueblo di Aruba.

BETICO A KIBRA CU A.V.P.

Despues di morto di Shon-A Eman q.e.p.d., lider di A.V.P., diferente componente y lidernan di bario di e partido berde a manifesta nan deseo y completo respaldo pa Betico bira e lider di e partido. Tur hende por corda con dilanti huez a ser declara cu Betico no por bira lider, pasobra e no ta ruman ni yiu di e difunto lider Shon-A Eman.

Tambe A.V.P., sabiendo cu P.P.A. semper tabata un partido di Federacion, es decir ta boga pa un Antiyas Uni, a bay forma gobierno cu nan, traicionando e lucha di Aruba.

Betico, mirando e rumbo cu A.V.P. a tuma, cu orguyo y honor,

cu un mente y consenshi limpi di no traiciona e lucha, a bandona e fila di A.V.P.

M.E.P. A KEDA FUNDA

Manera nos a bisa den principio caba cu ta poco ta e lidernan cu Aruba a conoce den su historia politico. Pueblo di Aruba a nota su liderazgo, su amor pa Aruba, su intencionnan serio pa sigui cu e lucha di Aruba, a apoye masalmente pa a funda Movimiento Electoral di Pueblo (M.E.P.), dia 9 di Februari 1971.

Aki Betico a demostra di ta bon prepara y a pesar di su edad hoben, e tabata tin amplio conocimiento di e constelacion politico di Aruba y di otro paisnan di mundo.

UNION DI TUR RAZA, RELIGION Y NACION

Betico Croes, e hoben politico, lider di M.E.P. a bin cu cambionan politico y a percura pa e union berdadero di e Pueblo aki. Mientras cu principalmente e partido P.P.A. semper a percura pa a dividi e Pueblo cu gruponan manera. Curasoleño, Boneriano, Surinameño,

Hulandes, Islaribeño, etc., Betico a kibra cu e sistema aki, mustrando e Pueblo cu sea bo ta di Corsow, Bonaire, Islanan Ariba, Hulanda, etc., bo ta Arubiano y bo ta pertenecer na Aruba.

Segun Betico ta tur e nacionnan o islanan aki a forma e isla y pronto e pais Aruba. Nan a bin traha na futuro di Aruba, pesey nan tin igual derecho di sinti nan mes Arubiano y no keda identifica manera P.P.A. te ainda ta trata di haci y pretende.

Sea bo ta catolico, protestant o di otro religion, sea bo ta blanco, preto, geel, sea bo ta pover o rico, sea bo ta di Playa, Santa Cruz, Noord, San Nicolas, etc., bo ta Arubiano, bo ta pertenecer na e baranca aki. Awe gracias na e sistema robez cu te awe P.P.A. ta hiba su politica, tin cierto habitantenan di Aruba cu ta keda sinti nan mes estranhero.

Gracias a Dios si, cu tin hopi cu a realisa cu P.P.A. ta robez y cu Betico y M.E.P. ta corecto, pasobra con bo mire e hendenan aki a bin Aruba, nan a traha aki, nan lo muri aki y nan yiunan a nace na Aruba y lo traha na progreso y futuro di Aruba.

Precisamente ta e ponencia aki a haci cu Betico su popularidad a sigui crece y a haya mas base pa a sigui lucha pa realisa e causa di Aruba.

Door di e sistema di integracion, Betico a bira e lider mas stima di tur tempo.

BETICO DEN OPOSICION

Durante e eleccion di Eilandsraad na aña 1971, Betico a haya nada menos cu 3.389 voto ariba su nomber y M.E.P. a bay den oposicion.

Como e lider mas fuerte e tempo ey den oposicion, M.E.P. a hiba un politica royal y a bay pa historia como e partido cu apesar di no tabata den Gobierno a ser teni cuenta cu nan debidamente.

Betico y M.E.P. a insisti cu un delegacion oficial di Eilandsraad mester bay Hulanda pa papia ariba e deseo di e Pueblo di



Na februari 1971 M.E.P. a keda funda, Betico den su discurso hunto cu e incansable lider di bario Sr. Benito Giel.



Betico, e persona cu semper tin tempo pa su pueblo y prensa.

Aruba pa cu su Status Aparte.

Ora cu e delegacion di Aruba a haya un no, e partidonan A.V.P. y P.P.A. a bandona e lucha y M.E.P. so a sigui cune.

Como lider di oposicion di e fraccion di M.E.P. e a forma parti di e "Commissie van Overleg" y miembro di "Arubaanse Raads-commissie Staatskundige Structuur" y den tur e reunionnan ey a lucha y hasta a rebeldia pa haya e reconocimiento pa e deseo di Aruba, esaki a sosode tanto na Hulanda, Suriname y otro islanan di Antiyas.

GRACIAS NA BETICO Y M.E.P. AWE ANTIYAS HULANDES NO TA INDEPENDIENTE, ANTO SIN PREPARACION

Mientras cu tur otro partido politico di Antiyas, incluyendo principalmente P.P.A. a bay di acuerdo pa Antiyas haya su Independencia na 1978, M.E.P., bao liderazgo di Betico Croes, a opone fuertemente, pasobra M.E.P. kier e Status Aparte pa Aruba.

P.P.A. e tempo ey no a importe

hinca Antiyas, pero especialmente Aruba, den un independencia sin un fase transitorio, den un un independencia, pero principalmente un Federacion descabeya. Awe e mesun partido aki, esta P.P.A., ta vota contra Status Aparte, contra Independencia, mientras cu den añanan '70 e tabata cla pa acepta un Independencia pa Aruba sin preparacion.

Si no tabata pa e hoben politico, Betico Croes, awe Aruba ta den e Federacion Antiyano Independiente, sin e posibilidad di a sali jamas for di esaki.



E Parlamentarionan Hulandes semper por a goza di e hospitalidad di Betico. Ta pesenan tin un gran aprecio y respet pa Betico, como politico, pero tambe como ser humano.

M.E.P. A BIRA E PARTIDO DI MAS GRANDI DI ARUBA

Na aña 1973, M.E.P. a bira e partido di mas grandi di Aruba, hayando nada menos cu 5 asiento di e 8 cu Aruba tin derecho ariba dje den Staten. Betico a bolbe aumenta den voto y a obtene e cantidad di 6.192.

Mediante un mocion den Staten M.E.P. a exigi reconocimiento di e "Status Aparte" pa Aruba. Bao e unico condicion aki M.E.P. a tuma parti na e Gobierno Central di e tempo ey.

Na aña 1975, M.E.P., den un forma aplastante a gana e eleccion di Eilandsraad, sacando 13 asiento.

Betico a haya 5.787 voto y a keda nombra Consehero General di Gobierno di Aruba.

Como Consehero General di Gobierno di Aruba Betico a encabesa misionnan politico pa Hulanda, Venezuela, Colombia, Panama, Costa Rica, Inglatera, Nacionnan Uni y e Organizacion di Estadonan Americano.

Asina, den su calidad como portavoz di e lucha di Aruba, e a cuminsa asisti na reunionnan di Social Internacional pa e busca sosten pa nos causa.

Atrobe na 1977 M.E.P. a gana eleccion di Staten, sacando 5 asiento y Betico a bolbe aumenta den voto, yegando na 8.156.

E aña aki M.E.P. a ser laga for di Gobierno Central y P.P.A. tabata

e autor principal.

Den eleccion di Eilandsraad na 1979, M.E.P. a bolbe sali e partido victorioso y Betico a haya 9.419 voto.

Betico, siguiendo cu e lucha di Aruba a percura pa otro victoria di M.E.P. na 1982 pa eleccion di Staten y Betico a saca 9.228 voto ariba su number. Durante eleccion di Eilandsraad di 1983, Betico a kibra tur record di voto personal, es decir cu un persona a yega di haya ariba su number y e a alcansa nada menos cu 10.506 voto, combirtiendone asina den e yiu di tera, e politico mas admira y stima di Aruba.

Nos ta convenci cu awor cu Aruba ta realisando su Status Aparte y esaki ta gracias na M.E.P., pero principalmente na Betico, cu Pueblo sa di mustre nan gratitud pa su valentia di a realisa e Status Aparte di Aruba. Comision Pro-Betico ta spera cu Pueblo di Aruba lo vota masalmente pa M.E.P. y Betico pa asina dia 1 di Januari 1986, e ta nos Prome Ministro Presidente.

REFERENDUM

Hopi ta e paisnan cu tabata puntra si enberdad e Pueblo di Aruba ta desea su Independencia, apesar cu M.E.P. a gana tur eleccion a base di nan campaña Status Aparte-Independencia pa Aruba.

Betico, como Consehero di Gobierno di Aruba, y como portavoz di e Independencia di Aruba a pidi Gobierno di Aruba pa organisa un referendum pa haya sa e opinion exacto di e Pueblo di Aruba.

Otro partidonan politico di e tempo ey, manera R.U.B.A., A.V.P. y P.P.A. a bay completamente contra e referendum y a pidi nan votadonan pa no tuma parti na esaki.

Ningun momento so esaki a kibra moral di Betico y di otro diputadonan, pero e referendum a continua bao auspicio di Nacionnan Uni, Hulanda, otro islanan di Antiyas y diferente invitadonan di exterior.

Di e cantidad di personanan cu a bay vota dia di referendum, nada menos cu 83 por ciento a

opta pa un Aruba Independiente. Cu e referendum tanto Betico como M.E.P. a haya razon cu Aruba ta desea su Independencia.

Betico a demostra cu pe e Voz di Pueblo ta esun cu ta dicidi

ariba su futuro y destino.



Miles y miles di persona ta celebra tur aña hunto cu Betico, dia di Himno y Bandera.

ARUBA A HAYA SU HIMNO Y BANDERA

Dia 18 di Maart 1976, Aruba, como e prome isla den Antiyas Hulandes, a inaugura su himno y bandera, en preparacion di su Independencia.

Cual pais cu lo ser liber no tin su propio identidadnan, e simbolonan di libertad?

Pesey e lider politico, Sr.

Betico Croes, a propone su Gobierno pa Aruba haya su propio himno y bandera.

Awe, despues di casi 10 aña, nos Pueblo henter ta orguyoso di su himno y bandera y dia 1 di Januari 1986, nos bandera lo bay laira, mientras cu nos himno lo ser toca pa indica na mundo henter cu porfin Aruba ta un pais liber.




Minister v.d. Stee na 1978 cu Betico Croes dilanti di un multitud cu e bandera y lemanan di Aruba.


BETICO TA RECONOCI



Betico ta saluda e presidente actual di Socialista Internacional y ex-cánciller di Alemania, Sr. Willy Brandt, un personahe di renombre mundial, y semper atento pa e lucha Arubano, cu ta worde dirigi pa Betico Croes.



Presidente di Sto. Domingo, Jorge Blanco tambe a ricibi Betico pa papia ariba e causa di Aruba.



E lider politico di Aruba, Betico Croes, tabata un di e prome politiconan Internacional cu a bai felicita Dr. Jaime Lusinchí cu su victoria y a entregue e bandera di Aruba, na nomber di e Pueblo di Aruba.



Betico a ser ricibi door di Presidente Luis Herrera 1980.



Prome ministro di Israel Shimon Peres den blo di Aruba, Sr. Betico Croes. Pronto Israeleno e.o. ariba e tereno di agricultura.



E delegacion di Aruba encabeza pa Betico Croes y Colombia Dr. Alfonso Lopez Michelsen pa pidi r

INTERNACIONALMENTE



Herrera Campins presidente di Venezuela na




Ex-presidente di Venezuela Carlos Andres Perez, gran amigo di Betico, semper a demostra comprension pa e lucha di Aruba.



es den conversacion cu lider di e pue-
to Israel lo yuda Aruba den varios te-



E presidente actual di Costa Rica, Luis Alberto Monje ta scuchando cu atencion e deseo di Betico pa un cooperacion mas estrecho entre Aruba y Costa Rica, despues di e realisa-
cion di Status Aparte pa nos isla.



tico Croes a bishita e tempo ey e presidente di
pa pidi respaldo pa e lucha di Aruba.



Presidente di Spaña, Felipe Gonzales semper a demostra gran interes pa e lucha di Aruba. Betico a mantene informa di e ultimo desaroyonan ariba e tereno aki. Spaña tambe lo juda Aruba proximamente, e.o. cu financiamento di un proyecto Hotelero.

BETICO SOLDAT Y MOTOR DEN ACCIONNAN DI AUGUSTUS

Na Augustus 1977, M.E.P. como partido di mas grandi di Aruba a ser laga for di Gobierno Central, pa asina P.P.A., hunto cu otro partidonan politico di Antiyas Hulandes, trata di boycotea e deseo di Aruba pa su Status Aparte, su Independencia.

Betico tabata sa di a mobilisa e Pueblo di Aruba cu cooperacion di diferente gremio, pero principalmente algun sindicato pa a protesta contra e hecho bajo di e partido P.P.A.

Aruba a pasa den dianan scur cu ta bay pa historia, pero cu a conduci cu tur gremio na Aruba, manera sindicatonan, Camara di Comercio y A.T.I.A., Clero y otro instancianan a uni forsa pa pone presion ariba Hulanda.

Den un forma uni un delegacion pisa a viaha pa Hulanda pa papia cu Gobierno di dicho pais.

Hulanda a priminti su cooperacion y a pone Gobierno Central sinti na mesa cu representantenan di Aruba bao liderazgo di Sr. Betico Croes. Aki a keda firma e tan afamado "protocol di Willemstad".



HULANDA A INSTITUI COMISION DI 7

Despues cu M.E.P. a sali for di Gobierno Central, Aruba a keda sin representacion, sin Ministro for di September 1981 te cu November 1982.

Un biaha mas Betico Croes, den nomber di Aruba, a protesta na Hulanda y Gobierno Hulandes a institui e Comision di 7 pa studia e consecuencia di e Independencia di Aruba pa cu e otro islanan y pa Aruba mes.

E biaha aki tanto Hulanda como Aruba kier ta sigur tumando na consideracion e fracaso di e conferencia di Mesa Rondo cu a tuma lugar a base di e Rapport di 'Konginkrijkswerkgroep'. Por ser bisa cu e politiconan Antiano a contribui grandemente na fracaso di e conferencia aki.



Profesor Weitenberg y Prof. Kapteyn entregando Betico e rapport final di e Comision di 7, den presencia di Srs. Miro Dabian, Henry Fingal y diputado John v.d. Kuyp.



CONFERENCIA DI MESA RONDO NA HULANDA

A base di e resultado di e raport di e comision di 7, a tuma lugar na Hulanda for di dia 6 pa 12 di Maart 1983 otro conferencia di Mesa Rondo.

Tur cos tabata demostra cu e deseo di Aruba un biaha mas lo no haya oido, pasobra tanto politico-nan Hulandes, Antiyano y algun di Aruba mes a trata di boycotea e Conferencia di Mesa Rondo. Betico como lider di delegacion di Aruba tabata sa di a lucha fuerte y a keda para firme pa e deseo di Aruba keda realisa.

Conferencia di Mesa Rondo a base di 33 punto di consensus a bay di acuerdo cu e Status Aparte di Aruba.

Dia 18 di Maart 1983, Betico a ser ricibi den un forma masal pa henter e Pueblo di Aruba, sea nan tabata simpatisa cune o no, pero tur hende tabata di acuerdo cu ta e ta e luchador pa e causa di Aruba.

Gobierno di Aruba cu Betico Croes na cabez a traha for di 1983 te cu awe pa a bin cla cu e 33 puntonan di consensus cu a keda acorda durante e conferencia di Mesa Rondo cu Hulanda.

Betico tabata un di e motornan tras di e proyecto di Drag-strip na Palo Marga. Aki e ta haya informacion di e plannan for di e organisadornan. Tambe por mira e.o. Srs. Wilfred Ho-Sing Loi, Frans Varis, Chico Croeze, Wim v. Helvoort y Juan Werleman (q.e.p.d.).



Delegacion di Parlamentarionan Hulandes durante tratamiento di cambio di Statuut na Juni di e aña aki. Betico a encabeza e delegacion di Aruba, y a pone cu Aruba a logra su Status Aparte na 1986.

Aruba a pasa den hopi contra-tiempo te cu hopi hende a cuminsa duda cu e Status Aparte lo keda realisa entrante 1 di Januari 1986.

Partidonan politico di Aruba mes, manera A.V.P., P.P.A., Charro Kelly di A.D.N. a vota contra e moneda di Aruba. P.P.A. a vota contra e Status Aparte/Independencia, pero ta asina leuw cu dia 1 di Januari 1986, Aruba lo haya su Status Aparte y cu Aruba lo ta un pais liber dentro di Reino Hulandes.

Si nos analisa bon y si nos ta franco cu nos mes, anto nos mester ta di acuerdo y consciente cu Betico Croes ta e politico, e luchador cu a para tras di e realisacion di e causa di Aruba, esta su Status Aparte. Dia 22 di November Pueblo di Aruba lo mustre nan amor, confianza y agradecimento, votando masalmente ariba su number, Betico Croes, number uno ariba lista di M.E.P.

Dia 22 di November Betico lo kibra otro record di voto, mientras cu dia 1 di Januari 1986 Betico lo keda juramenta como nos prome Ministro Presidente.

DIA 24 DI APRIL 1983, DIA SCUR DEN HISTORIA POLITICO DI ARUBA

Ken por a kere cu dia 24 di April 1983 lo a bay pa historia pa loke ta trata politica di Aruba y Reino Hulandes?

Ningun persona, pasobra e dia ey tabata uno mescos cu cualquier otro, nos lider tabata contento, papiando y repartiendo tareanan na e diferente lidernan di bario. Tabata parce na e animo di Betico cu e dia lo bira uno exitoso pa sera di e forma ey cu broche di oro e campaña di M.E.P.

Ya tur hende tabata papiando di e victoria aplastante di M.E.P., tumando na consideracion e cantidad di vehiculonan cu sticker y bandera di M.E.P. cu tabata ariba caya e dia ey.

Despues di e manifestacion tras di Cas di Cultura tabata bisto cu M.E.P. ta den e ambiente festivo di e victoria sigur.


Nos lider tabata contento, tabata sintie orguyoso di e entusiasmo cu su hendenan tabata mustre y su animo tabata hopi halto, pasobra tabata e victoria di e exito di e Conferencia di Mesa Rondo.

Poco poco diferente persona a bin ta manfiesta cu tog nan tabata sinti algo grandi o grave lo bay sosode e atardi di e dia aki.

Tur alegria y entusiasmo a cambia den lagrima, desesperacion, pasobra e lider politico, e lider di e causa di Aruba, Sr. Betico Croes, a keda gravemente herida pa un bala di revolver di un agente policial.

Aruba tabata ariba abao, comunicacion telefonico a cay por completo, mientras cu Pueblo tabata roga pa su bida.

Jamas Pueblo di Aruba por lubida e dia 24 di April 1983, pasobra si Betico mester a fayese, anto e lucha di Aruba tambe a muri.



Betico despues di e atentado contra su persona varios bes mester a ser trata den tanto hospital di Aruba como na Miami.

Pueblo como e futuro Prome Ministro Presidente di Aruba.

Mester acentua cu nos lider, Sr. Betico Croes, ta un bon Cristian, un persona cu hopi fe cu

a pone triunfa, e fe a yude realisa e causa di e Pueblo di Aruba.

Cu Dios dune bida y salud pa asina e por traha como Ministro Presidente di Aruba, na mehora-cion di e Economia di Aruba.

Pesey Pueblo di Aruba, nos ta contento cu Dios a scucha nos oracion cu awe nos tin nos lider hunto cu nos, apesar no 100 por ciento di salud, pero si cla pa sigui traha na bienestar general di nos

MINISTRO - PRESIDENTE

Aruba ta bai eligi un Ministro-Presidente. No un Monarca, no un principe-heredero.

Un Ministro-Presidente cu sa cu maneha un pais, no kiermeen tin tur poder, pero si tin tur DEBER.

Un Ministro-Presidente cu na luga di ser scucha ta pone como su deber di scucha pueblo.

Un Ministro-Presidente cu en vez di exige tur honor sa di duna honor.

Un Ministro-Presidente cu no ta bisa pueblo cuanto e sa pero ta demostra su sabiduria y capacidad den su gobernacion.

Un Ministro-Presidente cu sa cu e No ta un Principe heredero, pero un simple sirbisor di pueblo.

Kende a demostra tur e cualidadnan aki?

Kende a demostra cu ni su bida e no ta spaar na bienestar di e pueblo?

Ken ta e lider maximo escogi varios vez pa e pueblo y NO pa herencia?

P'ESEY DIA 22 DI NOVEMBER VOTA PA E LISTA CU TIN E PERSONA CU TA CORESPONDE CU TUR E CUALIDADNAN MENCIONA AKI RIBA.

TA UN SO TIN NO TIN MAS NI NINGUN ACTUALMENTE PA IGUALE.

BETICO

Yiu di Pueblo, escohi door di Pueblo, pa traha pa e Pueblo.

